



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim


tiryimiyim@aolima

tir yimiyim

TAPAK 3

Nükjidorong matong tashi Gaza nung raratsü: PM Netanyahu

Rajnath Singh-i UK semdangtsü aser lenirtem den senden amentsü



VOL. XXI NO. 85 (ADOK 85) DIMAPUR

TENTONÜ (MONDAY)

ANJETI (JANUARY) 08, 2024

₹ 5.00

East Timor President-i India semdangtsü

Imphal, January 7, 2024 (Agencies): East Timor President aser Nobel Peace Prize Laureate Dr. Jose Ramos Horta-i India semdangtsü.

Dr. Horta-i January 10 nungi 12 tashi 2024 Vibrant Gujarat Summit nung adentsü.

Lai tang mezüng atema India semdang aser iba ajanga East Timor o India tsüngda tesentaktep akangshiba sayur.

Iba osang ya arishi 12 tain climate activist Licypriya Kangujam-i sangoktsü. La ya Timor Leste atema Special Envoy lir.

Dr. Jose Ramos Horta-I

Manipur semdangtsü aser "Jose Ramos International Centre for Peace" atema lung azüngtsütsü ta Licypriya-isa ashi.

Dr Horta-i Timorese nunger sobaliba senmang atema inyakba nüngtem nung iba centre lapoktsü.

Dubai nung 2023 United Nations Climate Change Conference (COP28) mapang Licypriya-i climate activism inyakba atema nisungtemi meteta aküm.

Dr. Horta-i India semdangba ajanga Licypriya aser lar adopted home country East Timor tsüngda tesentaktep tashi itshir.

NNC (Non-Accordist) züngsem 4 temai adok

Guwahati, January 7, 2023 (Agencies): January 7, 2024 nü Mon district kübok Wakching nung Naga National Council (Non-Accordist) züngsem pezü Assam Rifles tsüngdang temai adok.

NNC telungpurtem ya 2019 nungi iba tesem nung mapa inyaksangshia aru ta osang angazüker.

"Assam Rifles-i kanga meranga inyakba ajanga Non-Accordist züngsem pezü tashi Wakching, Mon District nung temai adokogo. Parnoki 9 mm Pistol ka agütsü" ta Assam Rifles-i sangdong ka nung ashi.

Ketdangsurtemi telungpurtem indang tanga osang kecha memetdaktü lir.

Manipur sorkari journalists apuba aitsür: Congress

Imphal, January 7, 2024 (Agencies): Manipur nung tawa journalist ana apuba atema Congress-i BJP sorkari aitsüogo.

Manipur nung BJP sorkari tawa osangkaket ana nung osangbenertem apuba aitsür ta Congress media & publicity chairman Pawan Khera-i ashi.

Manipur nung journalists Wangkhemcha Shyamjai aser Dhanabir Maibam nati osang tamajung aser tesempatep adoktsüsa prokshi ta tai tonglokja police-i apuba atema Congress-i ola adoker.

"Manipur nung BJP sorkari journalists pua aser parnok dak tai tonglokja Freedom of Press anema inyaksangshir. Editors Guild of India (EGI)-i ochishia osang prokshiba atema BJP sorkari parnok den toktep. Manipur sorkari tensa mazüoktetba aser raksatsüba nungi jenbutsü atema item mapa inyaker" ta Pawan Khera-i ashi.

Manipur nung journalist ana apuba aitsür aser journalist temi tetsübu kecha melii parnok mapa inyaka odaktsütsüla ta paisa ashi.

"Indian National Congress-i akhümket osangkaket ana nungi yimozülurtem apuba aitsür. All Manipur Working Journalists Union (AMWJU), Editors' Guild Manipur (EGM) aser Paomi Welfare Foundation-i ashiba onüktem onokia pusema nungiter" ta Khera-isa ashi.

Journalist temi Manipur nung

chichiba osang prokshitsü merangba atema BJP sorkari freedom of press anema inyaker ta paisa shisem.

Kangleipakki Meira osangkaket nung yimozülur Wangkhemcha Shyamjai-i December 2, 2023 nü ocet ka züluba atema December 29 nü police-i pa apu.

Iba atema All Manipur Working Journalists' Union (AMWJU) aser Editors' Guild Manipur (EGM) külemi Wangkhemcha tekaratiba nung chioktsü mepishi aser December 31 nü pa bail nung chiok.

Külen, January 5 nü Imphal Police-i Hueiyen Lanpao osangkaket nung yimozülur Dhanabir Maibam apu.

Maibam-i tamangba yimsü aser kin tsüngda sempatep adokdaktütsü osang prokshir ta tai tonglokja police-i apu.

Dhanabir Maibam'er osangkaket ajanga tesempatep adokdaktür ta Manipur BJP vice president Laishram Meenabanta Singh-i ken o benokba nung ajemdaker pa apu.

Congress-i journalist tem anema bushisüngdang mesüi tangsa chiokang ta takhangba agütsüogo.

Congress-isa Manipur nung inyakba journalist ajak lendong nungi kümzuka ayutsü aser timi lidakja parnok nem temeten agüja aliba mapa inyaksangshidakjang ta takhangba agütsüogo.

India mezüngmeshiba atema Maldives-i minister 3 mapa nungi anentsü



New Delhi, January 7, 2024

(Agencies): Maldives nung minister aseme social media nung India aser Prime Minister Narendra Modi anema olentem züluba sülen par asem mapa nungi anentsüogo.

India nungeri Maldives semdangtsü aliba thiogo ta ashiba sülen Maldives nung minister tem aser lenirtem ola adok.

"Social media nung post kar ajanga India mezüngmeshiba atema India sorkari ashiba indang Ministry of Foreign Affairs-i tanü metetdaktüogo" ta Maldives sorkari ashi.

"Sorkar menden nung mener social media nung item olen prokshirtem mapa nungi

anentsüogo" ta Maldives sorkarisa metetdaktü.

Maldives sorkari Minister Maryam Shiuna, Minister Malsha Shareef aser Minister Mahzoom Majid nunger mapa nungi anentsü.

PM Modi-i tawa Lakshadweep semdangba indang noksa aser video kar lemsatepba sülen Maldives nung minister tem aser lenirtemi PM Modi anema olen kar lemsatepa liasü.

PM Modi-i snorkelling asüba post kanga belenshiba ajanga social media amshirtemi India nung Union Territory tilatiba Lakshadweep ya Maldives dang nungi tourist destination tangaba ta jembitsü tenzük.

Maldives sorkari item olen nung parnok madenba metetdaktü aser minister temi jembiba ya parnok nija tebilemba lir ta ashi.

Taoba Maldives president Mohamed Nasheed-i item olen ya tesempatsüka ta ashi aser pai President Mohamed Muizzu'er sorkar dang item olen nungi pilaa alitsü ashi.

Mohamed Muizzu-i election nüboyimba mapang Maldives nungi Indian military personnel 75 shi agientsü nangzuka liasü.

November ita Muizzu-i Maldives nung President akümba sülen "India first" policy melenshitsü tebilemba lemsatep.

Tesüba nung Maldives nung President temi sorkar ketdangtsütsü tenzükba sülen India mezüng semdangba liasü saka Muizzu-ibo mezüng Turkey semdang.

COP28 mapang United Arab Emirates nung pai PM Modi den ajurutepa liasü.

India aser Maldives tsüngda sepaitem anientsü atema core committee ka tentetogo. Maldives nung Indian personnel-i tzüyim madak patrol asütsü atema tayimtsü asem amshitsü mapa lemzuka lir.

Moreh nung telungpurtemi bomb amshia sepaitem amak

Imphal, January 7, 2024 (Agencies): Deobarnü Manipur kübok Moreh nung telungpurtemi sepaitem amakba osang angazüker.

Telungpurtemi bomb amshia sepaitem amaker aser Assam Rifles o Manipur Police-ia parnok den khataper ta osang ajanga ashi. Iba osang zülü tashi nung nisung aika yirua alitsü ama osang angazüker.

Moreh nung sepaitem aser telungpurtem tsüngda kanga khataper. January 2 nü telungpurtemi RPG amshia police commando mena aliba garitem amak.

Iba ya matalokdang December 30 aser January 1 anogotem Moreh nung anaben tashi khataper. Item tatalokba nung police pungu tashi yirua liasü. Tatalokba anaprong nung

telungpurtemi sepaitem amak.

Myanmar tsütsü nungi bendangertemi shilem agia sepaitem amak ama temulung meleme bilemer ta Manipur Chief Minister N Biren Singh-i January 2 nü metetdaktüogo.

Moreh nung sepaitem amaker ya Myanmar tsütsü nungi bendangertem aser talisa Kuki National Army (KNA-B) asütsü ama bilemer ta CM Biren Singh-isa ashi.

Congress-i Northeast state atema coordinators shimogo

Guwahati, January 7, 2024 (Agencies): 2024 General Elections atema All India Congress Committee (AICC)-i Northeast state tem asoshi Parliament Constituency Wise Coordinators shimogo.

Iba mapa ya Congress President-i mulunga agizükogo aser tongtipang constituency tem nung nüboyim mapa shitak inyaktü aser amaliteptsü sentong nung shilem ka lir. Iba list nung Assam nungi coordinators 14 aser tanga Northeast state tem nungi parnok 13 lir.

AICC-i Coordinators 27 shimogo aser parnoki Assam, Arunachal Pradesh, Manipur,

Meghalaya, Mizoram, Nagaland, Sikkim o Tripura nung tongtipang constituency tem nung temulung agüja inyaktü.

Parliament Constituency Wise Coordinators:

Assam: Kokrajhar - ST: Bhaba Nath, Dhubri: Shri Zakir Hussain Sikdar, Barpeta: Pradyut Bhuiyan, Darrang-Udalgori: Anwar Ahmed, Guwahati: Ramana Baruah, Diphu - ST: Nirmal Langthasa, Karimganj: Sapan Mandal, Silchar - SC: Anwar Hussain, Nagaon: JP Das, Kaziranga: Prof Ajay Gogoi, Sonitpur: Sanju Barua, Lakhimpur: Jayant Kalita, Dibrugarh: Utpal Gogoi, Jorhat: Rana Goswami.

Arunachal Pradesh: Arunachal-West: Padi Richo, Arunachal-East: Daniel Gao.

Manipur: Inner Manipur: Moirangthem Okendro, Outer Manipur - ST: Md. Fajur Rahim.

Meghalaya: Shillong - ST: Sanjay Das, Tura - ST: Brigady Sangma.

Mizoram: Mizoram - ST: Laldinmawia Ralte

Nagaland: Central Zone: Lovito Zhimomi, East Zone: Denngan Avenno, South Zone: Khriedi Theunuo.

Sikkim: Sikkim: Gopal Chettri

Tripura: Tripura West: Sabda Kumar Jamatia, Tripura East: Adv. Prasanta Sen Chowdhury.

St Joseph University nung NCC Camp ka tenzükogo



Dimapur, Aenjeti/January 07 (TYO): Nagaland nung aliba school aser college tem nungi NCC Cadets tem asoshi Combined Annual Training Camp ka 25 Naga Battalion NCC, Mokochung kübok St Joseph University, Chümukedima nung tenzükogo.

January 4-13, 2024 anogotem agitsü aliba camp nungya Kohima, Dimapur, Mokochung, Mon, Tuensang, Longleng, Shamator, Noklak, Wokha, Phek, Peren, Chumukedima, Tsemnyu aser Kiphire district tem nungi cadets 621 densema nisung 670 dak temai shilem agitar.

Brigadier Dipankar Saha, Group Commander, NCC Group Kohima ajanga Camp semdang aser terenemshibatem reprangshima liasü. Pa ya Col CST Swamy, Camp Commandant and Commanding Officer, 25 Naga Bn NCC ajanga agizüka liasü.

NCC cadets temi Quarter

Guard nung iba camp atema renemba Guard of Honour ka Group Commander-i reprang aser 'Know Your NCC' information kiosk semdanga liasü.

Tongtipang nisungtem ya Rev Sister Thianes Mary, DMI, Deputy Registrar aser Rev Sister Chinnammal, Head of Administration nati agizüka liasü.

Brigadier Saha-i cadets tem den jembidang linük meimba temulungsentsü adokdaksütsü, yimya tajung sübatsü aser military yimyatem nung training agütsütsü nükjidong nung iba camp ya akar ta ashi.

Pai cadets tem dang iba camp nung training maparen ajak tajungtiba nung angazütsü ajungshia liasü.

Paisa cadets, talisa tetsür cadets tem dang Indian Armed Forces, Police Forces nung commissioned officers akumtsü aser state sorkar mapa balala nung maongka aliba osangtem

lemsatepa liasü.

Central aser state sorkar mapa balala nung kulizüing kaket bena alirtem teyari agütsüba agitsü mechi Group Commander-i cadets tem dang NCC certificate tatidang balala agütsütsü ayongzüka liasü.

Cadet tem dang Republic Day Camp, Thalsainik Camp, mountaineering, skiing, trekking aser bendang lima nung oa Youth Exchange Programme nung shilem agitsü pai ajungshia liasü.

Iba sülen District Hospital Dimapur nung Blood Bank indang director Dr T Temsu aser Paramedics temi Voluntary Blood Donation nung tajangzük anguba indang audio-visual presentation agüja liasü.

Dr Temsu-i cadets tem dang atsükshia melie nisung takum kumzüksütsü asoshi azü agütsütsü ajungshia liasü. Parnoki yangji Blood Donation Camp ka ayongzük aser iba mapang cadets 82-i mulungsoa azü agüja liasü.

Mizoram nung airport ka aliba AAI mesüra Adani Group nem agütsütsü

Aizawl, Aenjeti/January 07 (Agencies): Tesendaktep tajungba kumdaksütsü mechi Mizoram sorkari state nung airpok ka dang aliba Lengpui airport ya maneni yanglushia ketdangsütsü atema Airports Authority of India (AAI) mesüra Adani Group nem agütsütsü jembir.

Iba osang ya Mizoram Chief Minister Lalduhoma-i Deobarnü sangdong aser ibai airport indang ki o jen aser tesendaktep tajungba kumdaksütsü nükjidong nung lir ta ashi.

Iba airport agütsütsü asoshi sorkar tebilemba indang pa Kolkata nungi meyipa shilangba sülen ash.

Pai Delhi nung Union Home Minister Amit Shah den sendem amenba indanga shisem, kong Assam-Mizoram arütsü tsütsü mangatetep adoka aliba indanga jembia liasü.

"State arütsü nung mepetmesü maginer," ta Mizoram chief minister-i ashi aser jembishinüa ken o angatetteptsü nükjidong nung lir ta ashi.

Mangatetep ajak yimjung aser tajunglen nungi angatetteptsüla, ta pai nenshia ashi.

Tayimtsü nung senzütsü atema ki o jen tajungba kumdakja ano state nung senotsü indoker puatsü merangba mapang ka nung iba airport agütsütsü osang ya angazüker.

Mizoram nung tang tamshidak airport ji Lengpui Airport ya dang lir aser iba airport yagi Mizoram aser India tesem balala sendaktepba nung tongti shilem agir.

AR-i Noklak nung Ex-servicemen meet ayongzük



Dimapur, Aenjeti/January 07 (TYO): Ex-servicemen aser Veer Naaris temi timtem balala ajuruba jangja aser bentettsü nükjidong nung Assam Rifles temi Noklak district nung January 7, 2024 nü Ex-servicemen Meet ayongzüka liasü.

Iba sentong nung Ex-servicemen temi pension dak sendakba aser danga maparen nung timtem ajuruba indang jembia liasü.

Iba sentong ya talisa Veer Naaris dak rangloker ayongzük, kechiaser Nagaland nung

asiyonga parnok ya meta talang nung alir asünung pension maparen nung timtem balala ajurur.

Assam Rifles temi iba ama sentong ayongzükba atema Ex-servicemen aser Veer Naaris temi pelashishia agizüka liasü.

Dimapur nung gari agi nisung ka tsükset

Dimapur, Aenjeti/January 07 (TYO): Dimapur Police ajanga sangdong ka nung ashiba agi, January 5, 2024 aonung 9:00 ako meta M/S Atlas Construction Gorapatti Golaghat Road, Dimapur anasa mejangjaba nisung ka (non-local tebur) dak mejangjaba gari agi tsüker jena ao.

Iba nisungba ya arishi küm 55 shi asütsü aser tar 5'5 ft shi lir.

Iba nisungba ya kanga

mejungi yiru aser District Hospital Dimapur-i anir ao saka doctor temi tasü bener aru ta sangdonga liasü.

Ozüing agi melaba maparen ajak inyakba sülen tasü mang ya jangjatettsü aser PM examination atema District Hospital morgue nung yua lir.

Nisungba ya T-shirt sentsü tanak, jacket anüngsentsü, long pant (pajama) anüngsentsü aser boxer sentsü tanak semer liasü, ta sangdong ajanga ashi.

Manipur: Kaketshir kati Bajaj scooter tejen ka electric scooter kumdaksütsü



Guwahati, Aenjeti/January 07 (Agencies): Manipur yimtiba Imphal nungi engineering student kati Bajaj-150 scooter tejen ka eco-friendly electric scooter (e-scooter) kumdaksütsü akum.

Tang Manipur Institute of Technology (MIT) nung computer engineering semester pungo buba nung azünger Albert Sarangthem yagi küm asem tejakdanga motorcycle ka yamaji yanglushia liasü.

Albert-i pa indang e-vehicles tem dang 'Samadon' ta ajar, koba Meitei nunger tar nunger otsü nung tashikang keta aliba kor ka lir. Pai e-bike dang 'Samadon EV I' ta tenüing agütsü aser e-scooter dang 'Samadon EV II' ta ajar.

Ghonda ana ser tesadang electric charge asüba sülen Samadon EV II ya kilometre 50 tashi oteter.

Imphal East district kübok Wangkhei Thambalkhong nung alir Albert-i ashiba agi, Bajaj-150 scooter ya mezüingbo tetsü indang tebu-i küm 50 shi jakdang 1970s tetenzüklen anishia liasü.

Iba sülen scooter ya küko nunger kati amshir yutsü aser par kidang song adoka yua liasü, anungji ni bener arua yanglushi, ta Albert-i ashi. Totzü atsükba gari ka

electric kumdaksütsü asoshi totzü agi mapa inyakba shilem ajak agizüksüsa akumer, aser yangji engine, carburettor aser danga gol shilem tem dena lir aser temelen motor, speed controller aser battery amala inoker.

Imphal nung tongtipang parts aser mechanical osettem manguba atema Albert-i tezü atangba ashi, anungji ita ti nungang Samadon EV II ya renemetet.

"Kü indang scooter yanglushitsü atema motor, battery aser speed controller amala ya aliba ya tang kin balala tsüingta mepetmesü adoka aliba mechi kanga menur ang ni atong," ta Albert-i sasaba ashi.

Pai item yimya ya internet aser Imphal nung aliba workshop tem nung e-rickshaw yangluba nungi angazük ta ashi.

Pai electric vehicle yanglutsü tenzüker 2021 küm Samadon EV I ya yangluteta liasü.

Albert dak sempet tajung aliba ajanga Samadon EV I yanglutetba tepela temaitsü Manipur Transport Minister Khashim Vashum-i pa nem sempet agüja liasü.

Ajidang masü 2022 küm pa azüingba engineering institute nungia tepela temaitsü kulizüing kaket ka agüja liasü.



January 07, 2024 nü Chennai nung Global Investors Meet 2024 senden tetenzük sentong nung Union Commerce Minister Piyush Goyal, Tamil Nadu Chief Minister MK Stalin aser tangartem tangokba noksa nung angur.

PM Modi-i Vibrant Gujarat Global Summit tenzüksütsüsü

New Delhi, January 07 (Agencies): Ato kilonser, Narendra Modi-i January 8-10 anogotem nung Gujarat state semdangtsü aser pai linük balala nungi lenirtem aser CEOs den senden amenba den külemi Vibrant Gujarat Global Summit tenzüksütsüsü.

Narendra Modi Gujarat nung Chief Minister inyakba mapang 2003 küm pai Vibrant Gujarat Global Summit ya tenzuka liasü, aser tanübo iba sabang ya alima nung nungtugu business forum aika amalitepa inyaktsü, shisa lemsateptsü aser partnership yanglutsü atema sabang ka kümogo, ta Prime Minister's Office (PMO) sangdong ajanga metetdaksü.

January 9 anepdang 9:30 ko meta Ato kilonser Modi,

Gandhinagar nung aliba Mahatma Mandir tonga aoba sülen alima linük balala nungi lenirtem den senden amentsü, iba sülen alima nung nungtugu corporations nungi CEO tem den senden amentsü.

Nikongdang 3:00 ako meta pai Vibrant Gujarat Global Trade Show tenzüksütsüsü.

January 10 anepdang 9:45 ako meta Mahatma Mandir, Gandhinagar nung Modi-i Vibrant Gujarat Global Summit 2024 tenzüksütsüsü, iba sülen CEOs den senden amentsü.

Iba sülen pa GIFT City-i oa nikongdang 5:15 ako nungi Global FinTech Leadership Forum nungi lenirtem den shisa lemsateptsü.

10buba Vibrant Gujarat Global Summit ya January 10 nungi January 12 tashi agitsü.

Taküm iba summit omenji 'Gateway to the Future' lir. Taküm summit nung partner linük 34 aser partner organization 16-i shilem agitsü.

Kasa summit nung Ministry of Development of North-Eastern Region-i North East Regions nung investment maongka balala sayatsü.

Iba Summit nungsa seminar aser conference agitsü aser item sentong nung onüktemji - Industry 4.0, Technology & Innovation, Sustainable Manufacturing, Green Hydrogen, Electric Mobility & Renewable Energy aser Transition towards Sustainability asütsü.

Vibrant Gujarat Global Trade Show nung company balalai parnoki yanglutetbatem sayatsü.

Muslim nungertemi Ram Mandir semzükba mapang mesenzütsüla: AIUDF

New Delhi, January 07 (Agencies): AIUDF tongti aser MP, Badruddin Ajmal-i Muslim nungertem dang lendong mataloktsü atema Ayodhya nung Ram tekülem ki semzükba mapang nung ainlen mesenzütsü tekümdangtsü metetdaksü.

Pai Muslim nungertem dang, Ram tekülem ki semzükba mapang kidang dang monga Allah dang sarasademtsüla, kechiyong BJP ya parnok atema tsükchir tulutiba lir, ta ashi.

Honibarnü BARPETA nung senden ka nung jembidang Ajmal-i Muslim nungertem

dang January 20 nungi tenzuka January 25 tashi mesenzütsü metetdaksü.

"Ram sünyanglu amenoktsü aser iba mapang nungji nisung lakh aika gari, train, bus aser tayimtsü ajanga iba tesem (Ayodhya) jagi aotsü. BJP sentong tulu lir, anungji ni asen Muslim nungertem dang January 20 nungi January 24-25 anogotem nung ainlen mesenzütsü metetdaksür," ta Dhubri nungi MP, Ajmal-i metetdaksü.

Tesülen osangbenertem den jembidang pai, "Yimjung aser tesünep atema ni ozü Muslim

nunger adianutem dang iba mapang nungji train ajanga ainlen mesenzütsü mepishiogo," ta metetdaksü.

Paisa, Ayodhya nung mosque bendoktsü dang atalokba ama joko mataloktsüla, iba nükjidong nungji ni iba tayongzükba ya agitsü, ta ashi.

"Anogo asemnü-pezünü ainlen mesenzüra timtem majurutsü," ta paisa shisem.

Ayodhya nung Ram tekülem ki semzükba sentong nung nisung 6,000 shi adentsü aser kasa sentong nungji Ato kilonser, Narendra Modi-a adentsü.



January 07, 2024 nü Ahmedabad nung Gujarat Chief Minister, Bhupendra Patel-i International Kite festival tenzüksüsdang tangokba noksa nung angur.

West Bengal nung nisung kari Trinamool Congress lenir ka khaset

Kolkata, January 07 (Agencies): Amongnü West Bengal kübok Baharampur nung mejangjaba nisung kari Trinamool Congress (TMC) lenir, Satyan Chowdhury khaset.

Mushidabad nung Trinamool Congress general secretary, Satyan injang agi yirua hospital kati anir ao, ajisüaka mekümzükteni asü.

TMC lenir kati, nisung kar motorbike kar nung aruba sülen

tejak chitepa Satyan Chowdhury dak injang khaloktsü, ta metetdaksü.

Police-i iba tatalokba bushisingdang tenzükogo.

Osang angazükba agi, tesüiba mapang Satyan Chowdhury aser Congress lenir, Adhir Ranjan Chowdhury na kanga junga metettepa liasü, ajisüaka tesülen Satyan-i ruling Trinamool Congress party nung aden.



January 07, 2024 nü Jammu nung BJP pusemertemi BJP National Tir, JP Nadda agizüksü atatepdang tangokba noksa nung angur.

Rajnath Singh-i UK semdangtsü aser lenirtem den senden amentsü

New Delhi, January 07 (Agencies): January 08, 2024 nungi tenzuka Union Defence Minister, Rajnath Singh-i anogo ananü United Kingdom semdangtsü aser iba mapang nungji pai Secretary of State for Defence, Grant Shapps den senden mena linük ana tsüngda tesendaktep atema jembitsü, ta Amongnü Ministry of Defence (MoD)-i metetdaksü.

Defence Minister Rajnath den Ministry of Defence nungi tongti ketdangsertem, DRDO, Service Headquarters, Department of Defence aser Department of Defence Production nungi tongti ketdangsertem alitsü, ta kasa sangdong nung shia lir.

Rajnath aser Grant nati defence, security aser industrial tsütsü linük anati amalitepa inyaktsü atema jembitsü, ta sangdong nung shia lir.

Rajnath Singh-isa UK Ato kilonser Rishi Sunak ajurutsü aser Secretary of State for Foreign, Commonwealth & Development Affairs, David Cameron nata ajurua senden amentsü.

Rajnath-isa UK defence industry nung CEOs aser industry lenirtem den shisa lemsateptsü aser yangji aliba India sensotem ajurutsü.

Yaküm November ita nung Rajnath Singh-i phone ajanga Grant Shapps den linük ana tsüngda defence tsütsü tesendaktep tashi itshitsü atema jembiba den külemi Indo-Pacific region nung security tsütsü tebilemstü onük kar lemsatepa liasü.

Defence Ministry-i ashiba agi, iba mapang nungji minister anapronglai defence aser security onük aika nung o lemtepa liasü, talisa tenati Indo-Pacific atema jemi.

Tenatisa sector tasen kar nung amaliteptsü atema jemiogo.

Grant Shapps-i Rajnath Singh dang tarutsü nung UK semdangtsü mepishia liasü.

Singh-isa Shapps Secretary of State for Defence shimba atema pa nem tenüngsang agüja liasü.

Iba mapang nungji Rajnath Singh-i X ajanga, "Phone ajanga UK Secretary of State for Defence Grant Shapps den jemiogo. Künati defence aser security dak sendakba onüktem, talisa Indo-Pacific nung tebilemstü onüktem nung o lemtepogo," ta metetdakja liasü.

Yaküm August ita nung ang Shapps Defence Secretary shima liasü. Pai Ben Wallace melenzük.

India aser UK nati Free Trade Agreement (FTA) agitsü atema jembia arudar. 2022 küm nungi India aser UK nati FTA tezüngzüktepa agitsü atema jembia arudar aser yaküm August ita nung FTA atema 12buba senden mena liasü.

2021 küm India-UK Comprehensive Strategic Partnership den külemi India-UK Roadmap 2030 tenzuka liasü, ta Ministry of External Affairs-i metetdaksü.

India aser UK naprongla tajangzük angutsü nükjidong nung India-UK Roadmap 2030 tenzük.



TIR YIMYIM YIMOBILEM (EDITORIAL)

DIMAPUR TENTONÜ, JANUARY (AENJETI) 08, 2024

Kinunger tsüngda atsü matsüdaktsüner

Tang ya India government-i India aser Bangladesh na tsüngda artsü kilometer 4,096 atsütsü tenzükogo aser ano India aser Mynmar na tsüngdaa kilometre 1643 atsü atsütsü tenzüksü aser aji küm pezü ser tesimal nung renemtsü center government sentong lir. Ajisüaka, India aser Mynmar na tsüngdabo teti asoshi atsü agi ar kümer alitsübaji Mizoram chief minister, Wb. Lalduhomai-ibo memulunger ta Delhi tashi tonga oagi center government nung tongti yimsüsür aser ketdangsertem dang shiogo. India tsütsü Bangladesh den artsüsa aliba limatemji West Bengal, Tripura, Assam, Meghalaya aser Mizoram state-tem lir. Item state-tem rongnung West Bengal dak alaka Bangladesh nung kasa kin aser kasa oshi jembir adianutem aliba state-tembo mali. Iba jagi Bangladesh den teti atema arladanga atsü atsütsübajibo shingai menokdang. Ajisüaka, Myanmar denbo teti atema atsü agi arladangtsüba sentong anema Mizoram-i ola adokbaji tapi masü, kechiyong Myanmar nunga pei adianu Mizo nungertema aika lir, anungji kinunger tsüngda mengutep aser majuruteptetsüsa atsü atsüdang alitsüji parnok shi azü aser temulung agi magizüktetter. Atangji, Myanmar nung Mizo nungertem dang masü saka Naga nungertema aika lir, anungji Nagaland chief minister-ia Mizoram Chief minister-i ashiba amaji shitetsüla. Mizo nungertem dang masü saka Naga nunger tejangraba kaji Naga nunger ta asüba kin ajak yimten yimsüsüba ka kübok linür, ibaji Nagaland akümba tangatetep ken o " 16 Point Agreement" nunga shia lir aser idakji ajemdaker Nagaland Legislative Assembly nunga tatartemi aiben iba tangtetep ken o ya mapa küma inyaksü asoshi lemteta lir. Ashiko, asenoki Naga nunger ajak Nagaland state kübok alitsüsa inyaksü ta lateta aliba onük jembidang, Naga nungertem ya India kübok aliba state-tem Assam, Arunachal Pradesh aser Manipur nung dang alitsü amai bilema alitsüa akok. Ano, tang tashi karibo Manipur nung aliba Naga kintem yabo Naga nunger masü amai bilema alitsüa akok. Aji dang masü saka tanü asüng chirtemibo Assam aser Arunachal state-tem nung Naga nunger lir ta memeteti alitsüa akok. Ajisüaka, India kübok Nagaland kidanger state-tem nung Naga nunger alibatemi toktsür, Myanmar nung Naga nungertem lakh pungo shi lir. Itemji Konyak, Khamniungan aser Tangkhul kintemi anir tanga Naga kintem aika lir. Aji oda, tangbo alima yimten balala kübok liaka, atsü agibo ar ladanga mali asünungji Mizoram aser Myanmar na tsüngda Mizo nungertemji ayongayonga oli aruli jajar aser yamaji Nagaland nunga Konyak aser Khamniungan tsütsübo Myanmar artsü adena anogo shia alima anatsülen nungi Naga nungertem oli aruli jajateter. Ajisüaka, kodang center government-i atsü atsüa ar ladangdir, India aser Myanmar artsülen alir Mizo nunger o Mizo nunger na aser Naga nunger o Naga nunger na ajuruteptsübajibo yutsür , tengutepa menguteptsü, anungji idangji dang kinunger agi bendanger akümtsü. Iba onük aser tebilemtsü ya tangar Naga kintem, asenok ama Aortemibo süoki ia mebilemtsüa akok, kechiyong Ao kinbo Nagaland nung aliba dak alaka tanga state nunga mali aser Myanmar nunga mali. Ajisüaka, kodang asenoki asen Ao kin-a oagi Myanmar kübok asen kinunger aser adianu yimtsüng karbo lir amato bilemdir, asenokia Mizoram chief minister-i ashiba amaji ashitsü. Tang Myanmar den ar ladanga aliba mapa yabo Mizo aser Naga nungertem ano zünga-shia memetet, tokolok aser shisa tenük maindang, British nungertemi parnok mulungka nung ar ladangtsüba lir. Iba jagi Mizo nungertemibo par adianu Myanmar tsütsü alirtem timtema tejenokdak makai arurtem lira yarir. Atangji, tanga India aser Myanmar na tsüngda Mizo aser Naga nunger ama senzütsübaji government nungi temelaba nungdaker, ajisüaka atsübo atsüdanga malinungji melamelaa oli aruli jajateter. Ibayongji, Myanmar nung alir tanurtem India len arua lulena school züngteter aser India len alir Naga nungertema melamelaa osangtjung bener otetter.

OLEMSABANG

2024 küm ya-a koda lia aotsü sentong yanglur ???

~ L. Kika Pongener.

(Yashi adok nungi...)

Mungdang : Tanü asen Naga lima nung mungdangtem reprangdangra, teimba ka tamang yimsu (Religious) mungdang masü, saka 'Mulongtet telok' Association, Organisation, Society etc. ka dang mesuka kümogo. Inyakyim ajak nung tamangba yimsu (Religion) yayim nung masü, saka alima lokti-tentet inyakyim (Liberal) yayim nung dang aniba angur. Mungdang teimba ka nung tenzükter shimyim aser rongsen ketdangsuba mapa nung tashishitsü keta topur mejungi inyakba angudang nuburtem kanga aoksar aser sungmanger...!!!??? Aji oda, tamanger arogotem longjemmer akümba mungdang yabo alima nem otsü/osang tamajung angashidaktsüba sabang ka masü, saka alima nubur dang tatishitsü tajung sayuba sabang ka asütsüla. Sorkar-i anir lokti-tentet ajak dang ochiba aser shitakba inyaka sayuba sabang ka asütsüla. Arogotem longjemmer akümba sabang ka asünung, alima nuburtemi akümtsübuttsüsa inyakyim ajak nung tashishitsü mekai merukmeruka inyaka sayutsüla. Anungji 2024 küm ya asen Naga nunger mungdangtem meyipa reprangshiba aser yanglushiba küm ka sudaktsüdi.

Yimden : Asen Naga lima ya yimden aikati yimsu asüba linuk ka lir. Sorkar, yimtsüng Putu menden, jila Council, mulongtet telok (NGO) aser nujiso bushir telok balala. Atangji, alima nung yimden teimba agi yimsu asüba linukji asen Naga lima ya ka asütsü. Aser item yimden ajak nungji saru-saji dena lir, item saru-saji jagi asen Naga nunger kibongtem ajak alena lir. Tema-telung temelen saru (Tax) onsaraba agi osettsüset aser chiyungtsü nung jenjang tali atur aser chiyungtsü aser osettsüset nung jenjang tali atuba jagi kibongtem dak mesuker aser sensak tiai yidaktsür. Joko asen Naga nunger nuburtemi temelen saru agi laaktetogo. Jila nungi tenzükter yimtsüng level tashi nung yimden yimsusuba inyakyim reprangdangra, teimba ka nung ochimashi agi sunga lir. Tanü jila aser yimtsüngtem aika nung rongsen akar, tashi (Power) akar, sentsü-keter kari yimden yimsusuba bangdak tashi ajak amokbanger, parnoki mulungba nung dang (Syndicate) yimden aniba ajanga tilar, sensaker aser meshi-mejungertem ola madokteter. Jila aser yimtsüng terenlok atema sorkar nungi anguba sen agi kar dang ajangzükter. Anungji 2024 küm yabo asen Naga lima yimden yimsusuba inyakyim meyipa reprangshiba küm ka sudaktsüdi.

Loktiliba : Tanü asen Naga lima nung lokti-tentet zünger-mezüngma, item lokti-tentet ajak nungji saru-molok madenba ka danga mali. Lokti-tentetbo tashi taitba-taitba akümer aser idangji kibongtembo tesensakba-tesensakba dang akümer. Nisung aika lokti-tentet onsara nung tanishir (Leadership) shilem agi ataba agi pei kibongbo telungi lujen alur. Loktiliba soro jungdaktsütsü merandang pei kibong soro mejungi akümer. Loktiliba takar kümdaktsütsü merandang pei kibong sensak tiai ayir. Loktiliba tejakleni anitsü merandang pei kibong tangar memenepi akümer. Joko Naga nunger nubur aikati item lokti-tentet saru-saji agi laakteta kümogo. Lokti-tentet ajunga nung lennir teimba kati yangko semer tenzükter. Lokti-tentet ajunga nung tanishir menden raktedang nubur tsüngda nung mepetmesu aser telemsa adoker. Anungji kokrabangla, yimden aser arogo dak alaka, kangabo menungdakba lokti-tentet karbo anena-adokba, mesura mayu-ang tajungba asütsü, kechiyong lokti-tentet onsaraba agi asen Naga nunger kibong aika sensak tiai ayir, aser asen Naga lima rongsenketzüng jenjang kanga mejungi kümdaktsür. Anungji 2024 küm yabo asen Naga lima nung loktiliba meyipa reprangshiba aser yanglushiba küm ka sudaktsüdi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kangtsüng Baptist Arogonung 'Hermon Ola' kensep video ka saya



January 7 nü Kangtsüng Batist Arogonung Nagaland Bible College nung Asst. Prof. Lima Lemtur-i (achichi nungi tanabuba) Hermon Ola indang video kensep sayatsür külen sannüker Nungsangtoshi aser kentenertem külemi tangokba noksa nung angur.

Mokokchung, Aenjeti/ January 07 (TYO): Ken ajanga Tsüngrem taochi aser temeim kuli asütsü tangatetba nung tentetba tebur temeja telok kati "Hermon Ola" ta sür ken asem indang video ka Kangtsüng Batist Arogonung January 7 nü Kangtsüng Baptist Arogonung sannüker Nungsangtoshi-i meshiteta sarasademtsür külen Nagaland Bible College nung

Asst. Prof. Lima Lemtur-i sayatsüogo. Hermon ola ken video ajanga tangartemi Tsüngrem temeim aser taochi tali tejangjaba nung angateta Tsüngremi mulungba ama takum litettsü tamang tulu nung iba ken video adoker, ta kentenertemi lemsatetp. Iba ken video adoktetsüsa kija kibong aser telok balalai nungitba den Kangtsüng

Baptist Arogonung Mission Board-i yariba asoshi tepelaba lemsatetpba den külemi Kangtsüng Baptist Arogonung sannüker Nungsangtoshi-i kanga ajungshia aser sarasadem agi nungitba asoshi pelaba metetdaksü. Anogo ishika tsüngda Hermon Ola video ken ya You Tube Channel nung "Hermon Ola" ta sür upload asütsü.

2023 küm India nung Khristantem anema inyakba tatalokba 687 liasü

January 07, 2024: 2023 küm India nung Khristantem anema inyakba tatalokba 687 liasü, ta New Delhi nung amenoka aliba telok- United Christian Forum (UCF)-i metetdaksü.

2014 küm nungi tenzüka India nung Khristantem anema inyakba kanga bulua akümer, aser tang alima nung Khristantem reshikangshiba linük tamajungtiba 50 rongnung India ya jenjang 11buba nung lir (Open Doors World Watch List).

India linük temzüng kübok Arrla 25 ajanga peii melungba yimsü amangtsü atema senso ajak nem temeden agüja lir, ajisüaka India nung Khristantem anema inyakba tamajungba dang akümer.

UCF-i toll-free helpline (1-800-208-4545) tenzüka lir. 2014 küm nungbo India nung Khristantem anema inyakba tatalokba 147 dang liasü saka 2023 küm nungbo November ita tashi nung Khristantem anema inyakba tatalokba 687 liasü.

Tang India nung state 28 nungi state 11 nungbo anti-conversion özüngtem benoka lir, aser item özüng kübok tamangba yimsü meyipdaksüba memelar aser tanga yimsü amangtsü atema sensotemi sorkar dang nungi temelaba meshitsüla; iba ya UN conventions anema lir.

UCF-i, 2023 küm January nungi November tashi nung state 23 nungbo anogo shia Khristantem anema inyakba tatalokba ana dak tema liasü, aser iba ya teblemstü onük ka

lir, ta ashi.

Talisa India nung Khristantem anema inyakba state pezüji Uttar Pradesh, Chhattisgarh, Jharkhand aser Haryana state tem liasü; yaküm Khristantem anema inyakba tatalokba 687 nungi tatalokba 531 bo item state nungi liasü.

Yaküm India nung Khristantem anema inyakba tatalokba teimtiba aliba state ji Uttar Pradesh (tatalokba 287) liasü, ta UCF-i metetdaksü.

Yaküm Chhattisgarh nunga Khristantem anema inyakba tatalokba 148 liasü, Jharkhand nung tatalokba 49 aser Haryana nung tatalokba 47 liasü.

"Madhya Pradesh nung Khristantem anema inyakba tatalokba 35 liasü, Karnataka nung 21, Punjab nung 18, Bihar nung 14, Gujarat, Tamil Nadu aser Jammu & Kashmir shia nung tatalokba 8, Rajasthan aser Orissa na nung tenetnet, Delhi aser Maharashtra na nung trokrok, Uttarakhand, West Bengal aser Himachal Pradesh nung pezüzü, Assam nung tatalokba ana aser Andhra Pradesh, Goa, Chandigarh aser Daman & Diu shia nung Khristantem anema inyakba tatalokba kaka liasü," ta UCF-i metetdaksü.

UCF-isa, "2022 küm Chhattisgarh state nung Khristantem anema inyakba ajanga Adivasi Khristan 1,000 dak tema jenshia liasü aser 2023 küm Manipur rara nung nisung 175 asü. manipur nung ki 5,000 dak tema aser Tenla ki 254

rongdoktsü," ta metetdaksü.

"Alima linüktemi item ama tatalokba aitsüyonga federal aser state sorkartemi itemji nokdangtsü atema tera dang inyaker," ta UCF-i metetdaksü.

Ano külen People's Union for Civil Liberties (PUCL) report ka ajanga, Khristantem anema inyakba nung police aser Hindutva teloktemi amalitepa inyaker aser Khristantem anema inyakbaji sorkar ketdangertemi mangu ama dang yutsür, ta metetdaksü.

CPC list nung India aser Nigeria na mezüngok

Washington, D.C, January 06 (Agencies): US State Department kübok USCIRF-i küm shia alima tesem balala nung tamangba yimsü dak sendakba temeden jenjang indang report sangdonger, aser taküm-a parnoki iba report sayaogo, ta International Christian Concern (ICC)-i metetdaksü.

Tang mezüng Azerbaijan linüka Special Watch List (SWL) nung züngokogo aser taküm agi küm tanabuba Vietnam-a SWL nung züngokogo.

Tesüiba küm 20 tashi USCIRF-i Vietnam ya Country of Particular Concern (CPC) nung züngoktsü benoka aruogo.

Nicaragua linüka taküm agi küm anabuba CPC list nung züngokogo, kechiyong iba linük nung yimsü dak sendakba temeden mali.

2020 küm nungi tenzüka United States Commission on International Religious

ANOGO ABEN TSÜNGREM DEN

Ni Aiatai

Idangji ni ashi, Ni aiatai! Kechiyong ni makaka; kechiaser ni temeli memerükba nisung aser ni temeli memerükba pur rongnung alir; kechiyong kü tenük agi chuba temeranger telok Kibuba nguogo. Isaia 6:5.

Tamaren Tsüngrem anguba agi temenen tali jangjaa angatetdaksür aser shidakba peiji angur. Tsüngrem nema anguba agi temenen süoki ia meblemmer aser pei shidakbaji mejangjadaksür. Isaiai tebang agi meshitetba Tsüngrem sentsüwangshi mangu tashi pei sasa temeshi ta bilemba nung temulung süa liasü südi. Isaiai Tsüngrem tsüktepba agi idangyongjisa pa koda temenen aser pa meketa aliba pur koda memerük aji angu. Tsüngrem külemstü aser memelenshir dang alitsübaji tamakoktsü. Asenoki shidakba Tsüngrem külemer ta sayutsübaji temulungjang melenshibaji lir.

Asenoki temenen alima den asenok sasa hai aura akar aser temenen taküm alir asü? Kar Tsüngremi aginüba taküm alidang asenok Tsüngremer jenjang nungi ajemzüka lua alir aser tajung junga aliba nisungji temeshi ta aseni repranger asü? Asenoki asen meketa alirtem den dang asenok temeshibaji medemdangra, asenok bendanga meshitetta aliba taküm ka lir ta amangdakja asenok ashioktsütsü akok. Aji saka kodang asenoki Tsüngrem ajurudir, asenok telangzübaji "Ni aitali!" ta alitsü.

Nai meketa aliri na aser alimaji balala ta majitetdaksü tashi na meketa aliri Yisu Khrista dak amangbaji nai mangutsü. Tsüngremi Pa temeshi aliba ama na meshitetdaksüner. Kodang Tsüngremi ne dak mapa inyakdir, idakji temerüktetba ne taküm nung alitsü ibaji alimai agütsüba dang nungi balaka asütsü. Alima, na meketa alirtem dena, ne temeshiba taküm jagi temeshi Tsüngrem tenzüksü pua arutsü.

Freedom's (USCIRF)-i India linük-a CPC nung züngoktsü atema benoka arur, ajisüaka US State Department-i magizüker. India nunga yimsü dak sendakba temeden tsütsü tayongzüka jenti lir.

Alima nung küm shia Khristantem teimtiba tepsetba linükji Nigeria lir, ajisüaka taküm-a CPC list nung Nigeria mezüngokba ajanga aikati aitsüdar.

Tesüiba küm 20 tsüngda Nigeria nung Fulani telok densema Islamic kiralongrar telok balalai Khristan meyirjang aika tepsetogo.

ICC nung Advocacy manager, McKenna Wendt-i, "State Department-i India aser Nigeria na CPC list nung mezüngokba atema International Christian Concern (ICC)-i teblemstü kanga akar. Iba linük anaprongla ya CPC linüktem rongnung nung züngoktsüsa aliba kuli lir. Khristmas mongpu mapang

nung Nigeria nung Khristan noklang aika tepsetogo. India nung anti-conversion özüngtem lir, loktii nisung tepseter aser yimsü dak sendakba nung alia oa amangertemi maneni Khristantem anema inyaker. ICC-i Nigeria aser India na nung asen adianu aser aianutsürtem atema teblemstü katsür aser onoki U.S. State Department dang item sorkartem dang tasüngdangba akatsü akhanger," ta metetdaksü.

State Department-i India aser Nigeria na CPC list nung mezüngoktsü telemtetba agiba anema USCIRF-i Congress dang iba onük angadangtsü mepishiogo.

Afghanistan linüka CPC aser SWL list naprongla nung mali saka Taliban telokbo Entity of Particular Concern (EPC) nung züngoka lir.

2018 küm nungi Boko Haram teloka EPC list nung densema lir.

AO OSHI ANGAZÜKDAK: TANÜ ANGAZÜKTSÜBA OJANG



Shinemshira

(adj) teshinem menemba (putrid smells)

* Shi ango ayokdak shinemshira kanga menemer.

Shiner

(n) tarutsü nung ataloktsü indang ashiba nisung (soothsayer)

* Tanü asüng tiyazü shiner aika lir.

OLONG PAITEP # 6660

Grid for OLONG PAITEP # 6660 with numbers 1-15 in various positions.

TIPLÉN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. ___i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. ___ kibur - (5)
13. Tebur tembar tsüngda jatepba - (4)

OLONG PAITEP # 6659 TELANGZÜBA

TIPLÉN :

- 1. Semtu, 3. Lepko, 5. Bilem,
8. Ulu, 10. Tsüngpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

KHEN SHISADANGDI

ALOKBAI AROGO INYAKYIM ATEMA TENZÜKER DANG MESHITETBA TSÜNGREM DANG ASHIR :

Oh Tsüngrem! Ni Alokba tanrep-a nü dang taginüba kar akanger ako!

- 1. Arogo tenzüker shim yim: tasen, tular takar, sempet maliyonga kecha masü, (okra) rongsen dang lirbo, sentsü (colour) aketer shima yura teperi, sentepi maruyonga, shimerbo odang arutsü. Tangatetba maliyonga pastor temi ashiba angara teperi.
2. Temsüa liaka sannükertemi ashiba mangatsüpur tembo meshimtsüla.
3. Sannukeri pei molungba nung Arogo atsüshidi asür.
4. Takar tular kidangibo hopta nung anaben asemben tashi-a sarasademi aor. Lenimaor sensaker kidangibo küm 4/5 nunga ken danga tetsüng majemokdang. Kiboksem makaba agi tasür ki mangu bushia senzüba sannüker. Deacon rongnunga Ochi jembir tembo senzüka yutsüba sannüker. Temelenshitsu ash nung kü dang shibai kechi ashitsu ta toktepba tenzüker.

Oh Tsüngrem! Ozü Aortem molungjang shia nung asüngdang dak jangma. Yamaisa ali nungbo nü santem tangari rakzüka bener omatsü-ani.... Alokba shisabulusetar. Anungji nai mapa inyakangma aser 2024 kümbo item jakla tamajung ajak toktsür, taküm tasen nung jajatsü, Arogo shia nung nai jatetba toklang tenzüker ajak den jembiangma ta ni Alokba kü tamang yari nü dangi Sarasadem abener. Amen.

~ Aienla Ao

Manipur CM Biren-i Assam CM Himanta den ajurutep



Imphal, January 7, 2024 (Agencies): Honibarnü Manipur Chief Minister N Biren Singh-i Guwahati nung Assam

onüktem lemsatep aser talisa Assam nung Manipuri nung indang jembi.

Manipur CM Biren-i Assam CM Himanta dang Manipur nung mepetmesü angatetteptsü atema amalitepa yariteptsü mepishi.

"Assam Chief Minister Himanta Biswa Sarma den par kidang ajurutepba atema kanga pelar. North East region dak sendakba security & development onüktem lemsatep" ta Manipur CM Biren Singh-i ashi.

"Assam nung aliba Manipuri nung kümüzüka ayutsü atema maparen kar lemsatep" ta paisa ashi.

Tanü NCHAC election nung voters 111,645-i shilem agitsü

Haflong, January 7, 2024 (Agencies): Hombarnü Assam kübok Dima Hasao district nung 13th NC Hill Autonomous Council election agitsü.

Asüng Dima Hasao nung voters 111,645-i indang tia yanglutsütsü.

Iba election atema candidate 101-i tenüng agüja liasü saka parnok 8-i tenüng meyipa agi. BJP nungi candidate 28, INC nungi 24 aser TMC nungi 11

asur AAP nungi candidate 5 li. Maneni independent candidate 27 lir.

13th NC Hill Autonomous Council nung menden 28 lir aser iba nungi asüng menden 22 atema polling agitsü.

Maibang East, Maibang West, Hajadisa, Harangajao, Gunjung aser Hamri constituency tem nungbo BJP candidate tem den tetokteper shinga mali takok nguogo.

Asüngnep 8:00 ako nungi polling tenzüksü aser nikonngang 4:00 ako nung tembangtsü. January 12, 2024 nü results adoktsü.

NC Hill Autonomous Council dang Dima Hasao Council ta ajar aser iba ya Indian Constitution nung Sixth Schedule kübok tentet.

Tang Debolal Gorlosa-i Council nung Chief Executive Member inyaker.

Manipur police-i journalist Dhanbir Maibam chiokogo

Imphal, January 7, 2024 (Agencies): Manipuri osangkaket "Huiyel Lalpao" nung journalist & editor Dhanbir Maibam anogo asemnü tepuokdak yokba sülen Deobarnü chiokogo.

January 5 nü police-i pa apuba ajanga Manipur nung press freedom atema tebilemstü tali kümogo.

Maibam-i osangkaket nung Manipur law & order tensa indang osang ka züluba sülen pa apu.

Iba osang ya Indian Penal Code nung sections 153-A, 505(1)(B), 505(2) aser Official Secrets Act nung 120-B anema lir ta Manipur police-i ashir.

Iba osang ajanga tetsübu

adokdaksür aser nübertem aoksadaksür ta police-isa ashi.

Manipur nung osang züluba atema journalist tejen apuba rongnung Maibam ya nisung tanabuba lir.

December 31, 2023 nü "Kangleipakki Meira" editor Wangkhemcha Shyamjai apu aser anogo asemnü lir chioka liasü.

Assam nung BJP candidate ka ket nung sen bena aliba apu

Guwahati, January 7, 2024 (Agencies): North Cachar Hills Autonomous Council (NCHAC) election agitsü anogo ka jakdang Hojai nung police-i BJP candidate ka puogo.

BJP candidate Monjoy Langthasa-i Rs 11 lakh tema bena aliba atema Hojai police-i

pa apu. Asüng polling agitsü aliba ajanga code of conduct ozüng benoka lir aser iba jagi senji administration ket nung agütsüogo.

Osang tejangja ka angazükba sülen police-i Haflong nungi aruba gari ana soter mita reprang. Idangji gari

ana nung sen bena aliba angu. Gari anaji Haflong nungi Guwahati-i aoerba liasü ta police-i ashi.

Police-i Langthasa den nisung pezü apu. BJP candidate 6 den tetokteper shinga mali takok angurtem rongnung Langthasa dena lir.



Arunachal Pradesh kübok Naharlagun aser Daporijo nung Tagin nungeri Si Donyi benjungmong indang Golden Jubilee amongdang agiba noksa angur. Si Donyi ya Tagin nunger indang tongti benjung lira ser kümshia January ita amonger. Taküm benjungmong nung Deputy Chief Minister Chowna Mein-i tongti tesemdang aser Education & Indigenous Affairs Minister Er Taba Tedir-i tetushi süa jaoker ama shilem agia liasü.



Mulungnen O

Onoki meima aliba obala asür **MEPULEMBA LONGKUMER** (Mopungchuket) ajungbena 23rd December 2023 iba lima nungi pila oer onok mangyim tejashi tia nung alidang kija, kibong, Arogo, Yimden, kiyonger, kinunger, medemertem, lokti balala, ana aser talang nung alir shirnokisa aria bilemja sarasadem, nebu aser rongsen ajanga yaritepogo, nenok ajak dang kanga pelaba lemsateper.

Tsüngremi nenok kija aser kibong maneni moajangma.

Temeim Kinungtsü, Chirnur, Semchisemnur & Rapirtem

ASO : 07.02.1940 ASÜ : 23.12.2023



Noto Peninsula nung aliba Wajima tesem nung shishilempadak tesem ka nung mi adokba sülen nüburtem yangji senzuba noksa nung angur. Japan indang Noto Peninsula nung nisung 222 samar bushir aser yangji Deobar aonung rer alatsü mesüra tzünglu sashia arutsü ta shia lir. Japan nung January 1, 2024 nü menoknok tesashi anakba nung nisung 126 takum samar lir.

Rohingya refugee camp nung mi adok; ki 1,000 dak tema rongtok

Cox Bazar, Aenjeti/January 7 (Agencies): Bangladesh kübok Cox Bazar nung amenoka aliba Rohingya refugee nung camp ka nung mi adokba sülen ki 1,000 dak tema rongtokogo aser iba ajanga nisung meyirejang aika talidak makai kumogo, ta fire official ka aser United Nations-i Deobarnü metetdaksü.

Mi ya Honibar aonung ayaterem nung Ukhiya kübok Kutupalong camp nung adok aser kanga kara prokshia oa liasü, ta Ukhiya Fire Station tekolakba Shafiqul Islam-i Associated Press dang ashi.

Lendong nung nisung asüba osangbo kecha mali, ta paisa shisem.

"Mi kanga tulu ka adok aser camp nung ki 1,040 rongtoka liasü. Ukhiya aser district kübok tanga station tem nungi fire units 10 yokba sülen mi temseptsü atema ghonda anashi agia liasü," ta pai ashi.

Iba tesem nungi Associated Press osangbener kati ashiba agi, tanur aser tetsür densema refugee meyirejang aika parnok indang osütsüt balala bener moapui jenshia ao, kechiyong Deobar anepdang züngia lia mi kanga kara prokshia ao.

"Onok kanga asüker aser tang tensa kanga mejungi lir. Mi lendong nungi tera agi dang jenboba sülen ozü semchirtem den külem ayong ka anasa jenoka lir. Mi agi onok ki rongtoktsüogo," ta arishi küm 65

tain Zuhura Begum-i ashi. United Nations indang refugee agency, UNHCR-i email ka ajanga AP dang ashiba agi, mi temseptsü atema mibenertem nem temlungertemi teyari agüja liasü.

Mi ajanga takoksa bener arutsüba tang asadangdar, ta kasa sangdong ajanga metetdaksü.

Mi kodaser tenzük iba indang osang tejangja memetet, ajisüaka Islam-i ashiba agi, lishi agi yangluba oven ka nungi mi ya adok asütsü ta refugee tem shiogo.

Refugee camp tem nung mi ya kanga bulua adoker aser taoba mapanga iba amala lendong ajangshiogo, aser iba mapang ki meyirejang aika rongtoka liasü.

March ita mi lendong ka atalokba sülen refugee tem aika ki makai aküm.

Küm aika tsüngda Myanmar nungi Rohingya nung refugee million ka dak tema Bangladesh-i jenaogo, kong 2017 küm August ita Myanmar military-i jenjang tesashi agiba sülen Rohingya nung 740,000 shi arrtsü aden jena aoba densema lir.

Kasa mapang nung 2021 küm military-i sorkar atsünga sülen Myanmar nung tensa tamajungba kümer lir aser refugee tem meyipa yoktsü atema merandangba tamakok ngua arudar. Bangladesh Ato Kilonser Sheikh Hasina-i mapa

balala nung, refugee tem ya tashiyim agibo meyoktsü ta shia arudar. Rights teloktemi ashiba agi, refugee tem meyipa yoktsü asoshi tang mapang tetemjen masü, kechiyong Myanmar nung tensa kanga mejungi kümer lir.

Muslim Rohingya nung Myanmar nung kanga mezüngmeshia amshir, kong parnok nem lisopur jenjang aser temzüng ozüng kübok temeden magütsür.

Nükjidong matong tashi Gaza nung raratsü: PM Netanyahu



Jerusalem, Aenjeti/January 7 (Agencies): Israel Ato Kilonser Benjamin Netanyahu-i, nükjidong ajak matalok tashi Israel-i Gaza nung raratsü aser talisa Hamas raksatsütsü ta shiogo.

"Ita asem tejakdang Hamas puri azütokshi lendong tulu bener arutsüogo," ta pai ashi. "Ni aniba sorkari IDF dang Hamas pur samatsütsü, Hamas puri pur orr alirtem anir arutsü aser Gaza-i joko Israel ojang dang amokmerendaksütsü atema jenjang tapet agitsü tetuyuba agütsüogo," ta Netanyahu-i ashi.

"Onok nükjidong matalok tashi rara mamentsüla," ta Netanyahu-i ashi. "Onoki Hamas pur nem anisüngzük magütsütsü aser south aser north naprongla nung security tsütsü tetsükdaksütem ajak magin tashi onoki raratsü. Nükjidong matalok tashi aser tatembang ka matong tashi maparen ajak sentoka toktsütsüla aser takok mangutashi longjemer inyaksüla," ta PM-i ashi.

Maneni Israel army temia Gaza Strip north tsütsü Hamas indang command structure ka

raksatsüogo ta ashir.

Army odongtar Daniel Hagari-i osangbener dang ashiba agi, Palestine nung telungpur ya tangbo kanga ajema kumogo aser tanishirtem mali lir.

Gaza north tsütsü Israel-i telungpur 8,000 shi tepsetogo, ta pai ashi.

Tangbo Israel Defence Forces (IDF) ya south aser central Gaza nung Hamas samatsütsü rangloker inyaker, ta pai ashi.

Iba rara tenzük Israel-i nisung 22,000 dak tema tepsetogo, ta Gaza nung Hamas-i ketdangsuba health ministry ajanga ashir. Tesüiba ghonda 24 tsüngta nisung 113 dak tema asüba osang lir ta health ministry ajanga Deobarnü ashi.

Israel-i Hamas den raraba mapang Gaza kanga mejungi raksatsüogo aser iba litsü nung nütsüng yongsük million 2.3 aliba nungi timba pei ki yutsür tesem balala nung jenoka lir.

October 7 nü Israel south tsütsü Hamas telungpuri civilian timba sür nisung 1,200 tepseta ano nisung 240 shi pua bener aoba sülen Israel-i Gaza tesem ajungalen amak tenzük.

Bangladesh nung opposition maden agiba election vote azüng tenzükogo



Deobarnü general elections agidang Bangladesh Ato Kilonser Sheikh Hasina-i Dhaka nung vote agütsüdang tangokba noksa nung angur. Bangladesh nung Deobarnü agiba election ya ajanga Ato Kilonser Sheikh Hasina kümsük pungo buba office nung amentsü tejangja lir, kechiaser opposition temi anema nokdaker aser aika puogo.

Dhaka, Aenjeti/January 07 (Agencies): Bangladesh nung Deobarnü general elections agiba sülen vote azüng

kechiaser lai kiralongrar telok ta tenüng jaloktsüba opposition temi anir iba election nung shilem magi.

Mapang ka makamait agi sünger aliba linük, Bangladesh ya rongsenketzüng tsütsü Hasina-i kanga junga ajungket, saka lar sorkari meimchir temeden anema inyaker aser opposition tem samatsütsü meranger ta aitsür.

Lar party den tokteper aikabo meliasü saka party ka kisüngi sorkar kumtetba ama mesayutsü mechi constituency kar nungbo parnoki candidate meshim.

Züngsem ajak amai apuba opposition Bangladesh Nationalist Party (BNP) ajanga nüburtem dang longkak aittsü ayongzük aser tema-tazütsü agiba election nung shilem magitsü ajungshia liasü.

(Maneni tapak 8 nung...)

Andrey Rublev-i Hong Kong Open kokogo



Aenjeti/January 7, 2024 (Agencies): World number five asayar Andrey Rublev, taruba hopta nungi tenzuka asayatsü aliba Australian Open atema renemshiba mapang pai Deobarnü Hong Kong Open final nung Finland nunger asayar Emil Ruusuvuori 6-4, 6-4 agi koka iba asayamung takok marok benogo.

Arishi küm 26 tain Rublev-i tang tashi nung Grand Slam quarter-finals teku tonga asayaogo, saka pai quarter adena asayadanga mali.

Ajisüaka pai ATP tour 15buba minute 77 nung akokba sülen pa-a Australia Open

akoktsü imlartem rongnung ka akümstsü.

"Iba asayamung akokba atema kanga pelar. Ni hopta tepeyong kanga junga asayaogo," ta Rublev-i ashi.

"Ni kanga pelashishia Melbourne-i aotsü. Ni iba yimti nung hopta ka practice asütsü aser iba sülen Australia Open tenzüksü," ta paisa shisem.

Rublev tatemsa top 50 tema nung aliba asayar kati tsükdaktsüba ya August ita Cincinnati Masters nung jenjang 69buba nung alisang Ruusuvuori-i tsükdaktsüba liasü.

Deobarnü final asaya nung

Rublev aser Ruusuvuori napronglai kanga junga asaya tenzük aser tena pronglai game 3-3 koka liasü, ajisüaka asaya tenetbuba nung Rublev-i Ruusuvuori indang serve ka break asü.

Ruusuvuori-i set point ka kümzükba sülen 4-5 aküm ajisüaka taruba asaya Rublev-i koka mezüngbuba set kokatok.

Asaya tanabuba shilema Russia nunger asayar yagi amokbanger asaya aser 4-4 aliba mapang Rublev-i service ka break asü aser iba sülen taruba asaya koka pai iba asayamung koka liasü.

Rafael Nadal Australian Open nung masayatsü

Aenjeti/January 7, 2023 (Agencies): Nüngtugu tennis asayar Rafael Nadal, tetsü yiruba ajanga taküm Australian Open nung shilem magitsü atema Deobarnü telemtetba agiogo.

Grand Slam 22 tashi koker aliba asayar ya taoba küma yiruba ajanga iba asayamung nung shilem magitet aser pa asaya tenzük hopta ka majung tsüngda tang ano masayatetsüsa kümogo.

Spain nunger asayar ya yiruba ajanga küm ka shi masayai lir Brisbane International nung asayaba nguogo.

"Ni Brisbane nung tatembangbuba asaya nung tetsü nung tera timtem adok aser iba ajanga ni shisabulua liasü," ta pai social media sabang X ajanga metetdaksü.

"Ni Melbourne tonga aoba

sülen MRI agitsü asoshi maongka angu aser tetsü tera shisar aliba puteta liasü, ajisüaka taoba mapang yiruba kasa tesem nung masü, koba osang tajung lir," ta Nadal-i ashi.

"Ni tangbo set pongu asayaba asayatem nung shilem agitsü renema mali. Ni doctor ka den ajurutepa temang anepalutsü aser anisüngzüksü atema Spain-i meyipa aotsü," ta pai ashi.

Brisbane International asayamung nung Nadal-i kanga junga asaya tenzük aser Round of 32 nung pai Dominic Thiem 7-5, 6-1 agi ako, aser iba sülen Round of 16 nung Jason Kubler-i 6-1, 6-2 agi koka liasü.

Ajisüaka quarter nung pa Thompson-i 7-5, 6-7, 3-6 agi tsükdaktsü aser asaya mapang tetsü atsüba ajanga pa shisabulua liasü.

HI Junior tetsür national coaching camp atema asayar sangdong

Aenjeti/January 7, 2023 (Agencies): Hockey India-i Junior Women's National Coaching Camp atema asayar 41 tenüng sangdongogo. Iba camp ya Sports Authority of India (SAI), Bengaluru nung January 8 nü tenzüksü.

Core probable group tasenba ya 2023 küm domestic championship balala nung asayaba dak ajemdaker shimogo.

Asayartem January 8 nü coach Tushar Khandker den ajuruteptsü aser parnok February 6 nü tashi iba camp nung shilem agitsü.

"Iba telok nung asayartem ya Hockey India Junior Women's National Championship, Zonal

Championships aser Junior Women Academy National Championships aser Zonal Championships nung asayaba dak ajemdaker shimogo," ta Khandker-i ashi.

"India nung sempet tajung aketba asayar agi anünga mali. Ni iba telok tasenba den inyaksü yongya atar, kechiyong camp mapang asayartem kanga junga asadangtsü aser taruba FIH Junior World Cup dak rangloker parnok anitetsü," ta paisa shisem.

Asayartem yamai alitsü: Goalkeeper: Vidyashree V, Aditi Maheshwari, Nidhi, Engil Harsharani Minz

Defender: Lalthantluangi, Niru Kullu, Mamita Oram, Thounjaojam Nirupama Devi,

Jyoti Singh, Anjali Barwa, Pawanpreet Kaur, Puja Sahoo

Midfielder: Priyanka Dogra, Rajni Karketta, F Lalbi Aksiami, Manisha, Nirali Kujur, Hina Bano, Ksetrimayum Sonia Devi, Anisha Sahoo, Priyanka Yadav, Khaidem Shileima, Supriya Kujur, Jaisikdeep Kaur, Binima Dhan, Huda Khan, Sakshi Rana

Forward: Sonam, Sanjana Horo, Dechamma PG, Ishika, Himanshi Sharad Gawande, Kanika Siwach, Nisha Minj, Yamunna, Geeta Yadav, Gurmail Kaur, Lalrinpuoi, Munmuni Das, Ashwini Punjab Kolekar, Sunelita Toppo

Standbys: Lakhimoni Majuwar (Goalkeeper), Mamteshwari Lahare (Defender), Sejal (Forward).

Pollard MI Cape Town captain kümogo



Kieron Pollard

melena liasü.

"Rashid Khan tangbo masayatetsü, kechiyong pa yiruba taneptsü mongui lir. MI CT-i Rashid takaratiba nung aneptsü imlaja atar aser pa yakta asayatsü yongya atar," ta club sangdong ka ajanga metetdaksü.

Ajisüaka Rashid ya Afghanistan team India nung T20 asaya asem asayatsü aliba atema shimba asayartem rongnung densema lir, saka pa masayatetsü akok.

MI Cape Town pur iba asayamung nung mezüngbuba asaya January 11 nü Durban SuperGiants den asayatsü.

Aenjeti/January 7, 2024 (Agencies): Taoba mapang West Indies nunger all-rounder Kieron Pollard, Deobarnü SA20 nung MI Cape Town captain asütsü shimogo.

Mezüngbo Rashid Khan nem captain mapa abentsü atema nongloksü, ajisüaka pa yirur aliba ajanga Pollard-i pa

Cape Town nung Kagiso Rabada, Rassie van der Dussen, Sam Curran, Jofra Archer aser Liam Livingstone nunger amala asayar tajungtem densema lir.

Kasa mapang nung MI Emirates-i ILT20 nung parnok team len anitsü atema Nicholas Pooran shimogo.

Bangladesh nung opposition maden...

(Tapak 7 nungi...)

Ajisüaka arishi küm 76 tain Hasina-i nüburtem dang democratic inyakyim nung tamang akatsü ayongzuka liasü.

"BNP ya kiralongraba lokti ka lir. Iba linük nung democracy maneni alitsü mechi ni tajungtiba nung inyaker," ta lai vote agütsüba sülen osangbener dang ashi.

Iba elections results ya Hombarnep tashinung sangdongtsü imlar aser polling

station kar nungbo ruling party candidates tem temaba jenjang nung aliba television channel temi sayur.

Deobarnü agiba general elections nung vote agütsür shilem 40 shi liasü, ta Chief Election Commissioner Habibul Awal-i osangbener dang ashi.

Iba election ya yimya shidak amshia agi ta sayutsü mechi vote agütsü arutsü ajungshia sempet amshiba osangtem lir.

"Election commission-i vote taila amshia vote agütsür timba kumdaktsütsü tsüboa bilemer," ta BNP tekolakba Tarique Rahman-i Britain nungi ashi, kong pa jenoka lir.

Shiri takok angutsüar temetet asüba yong vote magütsü ta aikati ashir.

Tang yimsü tesüdak Awami League nem vote magütsüra teyari agiba government benefit cards meshitsü amokmerenba osanga lir.



Chile tetsür hockey asayartem FIH Hockey Olympic Qualifiers asayatem atema Birsu Munda Airport, Ranchi tonga aruba sülen tribal artists tem den tsüngsangba noksa nung angur.

BILEMDANGANG

"Aremzuka inyaksangshirtemi tesendaktep junga yuteter."